

لقاء الرئيس محمد أنور السادات

بالصيادين بالاسكندرية

في ١٢ سبتمبر ١٩٨١

بسم الله

أخوتي وأبنائي من الصيادين ممثلوا صيادين مصر بكل الحب نجتمع اليوم
لنحتفل بعيدكم الثاني وهو عيد من أعياد مصر بعد أن أثبتتم أنكم الأمناء علي
شعبكم وعلي أهدافه وعلي أمنه الغذائي

لقد كانت كلمة شيخ الصيادين بالاسكندرية الشيخ علي وعضو مجلس
الشوري والقرارات التي أتخذها مؤتمرهم ، الذي يمثل مليونين من شعب
مصر ، وكذلك الكلمة التي ألقاها رئيس الاتحاد الأخ الفقي ، ثم هتافاتكم
لمصر ولمصر وحدها ، كان هذا هو التعبير الحقيقي الذي قصدت به في
القرارات الأخيرة أن انبه النفوس الصغيرة والعقليات الحاقدة ، أردت أن
أنبههم أن شعب مصر كله يرفض هذا السلوك منهم

اليوم في كلمات الشيخ علي والفقي ، اليوم هتافاتكم ، في انفعالكم ، مصر ،
روح مصر ، .. وأسعدني وسوف يسعد كل مصري يستمع الآن الي هذا
الاجتماع والي انفعالكم ، سوف نسعد جميعا بكم في مصر حينما تقررنا أن
لا مشاكل لكم نتناقش أبدا في هذه المرحلة ، إلا مشكلة تأييد مصر ، تأييد
الحرية ، وتأييد الديمقراطية .. أعجبنى جدا وسيعجب بكم شعبكم دائما حينما

يعلن الشيخ علي باسمكم وباسم ٢ مليون صياد ان المشكلة اليوم ليست مشاكل لا مهنية ولا فئوية ، وإنما المشكلة اليوم هي اننا يجب أن نقف جميعا رجل واحد من أجل مصر ، من أجل وحدة شعب مصر ، من أجل ضرب الذين يريدون الفتنة الطائفية ، من أجل ضرب الذين يستغلون الدين ويتسترون وراءه ، من أجل ضرب الذين يستغلون الديمقراطية ويتسترون وراءها .. سيعجب بكم شعبكم ويفخر بكم شعبكم . في مصر ، يفخر بكم الـ ٢ مليون صياد ووعيمهم الذي سبق وعي الكثيرين ممن حاولوا أن يجعلوا من الاشتغال بالسياسة حرفة وفتنة ونقمة علي هذا الشعب ، تخلصنا منها منذ ثورة ٢٣ يوليو

الآن أخوتي وأبنائي . كما سمعتموني أتحدث اليكم في حديثي الذي وجهته لكم وللشعب كله من خلال اجتماع المجلسين والمستشارين ، هناك من يحاول أن يعود بالبلاد الي ما قبل ٢٣ يوليو ، أي الي فساد الأحزاب ، الي فساد المعارضة ، الي ضرب حقوق الشعب ، لم يكن متاح لنا قبل ٢٣ يوليو أن يتعلم أبنائنا لأننا كنا لا نملك ، نحن السواد الأعظم من الشعب ، كنا لا نملك مصاريف التعليم وكان الذي ينال هذا هم أبناء الأغنياء وأبناء الباشوات . اليوم كل ابن من أبنائنا يحصل علي درجات في التعليم يدخل لكي يكمل تعليمه العالي وأصبح أبنائنا جميعا ، أصبح منهم أطباء ومهندسين ومدرسين وضباط وقضاة ، يريدوا أن يعودوا الي ما قبل ٢٣ يوليو لكي يحكموا هم ولكي نظل نحن كما كان الحال قبل ٢٣ يوليو في خدمة هذه الطبقة وهذه الفئة التي أرادت أن تضع وصايتها علي مصر

ده كان سبب من أسباب الصدمة الكهربائية التي قصدتها في قراراتي والتي أيدتموها وأيدها معكم شعب مصر بعشرة ملايين من أصواتهم تقول لكل هؤلاء نحن لن نعود أبدا الي الورااء ولن نسمح أبدا بأن تحتكر فئة فاسدة حكم البلاد ، مرة تحت شعار أنهم كانوا باشوات أو أبناء باشوات ، أو مرة أخري لأنهم يدعون أنهم الفئة التي حصلت علي التعليم ، وحصلوا علي التعليم من جهدنا نحن ، نحن أبناء الشعب الذين كنا ندفع الضرائب قبل ٢٣ يوليو ليستمتع بها هؤلاء وأبنائهم في التعليم وفي أوروبا .. لا .. ولا عودة الي هذا أبدا ، بل أن الفضل في مصر للذي يقدم لمصر الحماية ويحفظ شرف مصر وتقاليد مصر ، أولئك الذين يعرفون العيب وهم السواد الأعظم من شعب مصر ، هم القاعدة الشعبية ، هم نحن جميعا، اليوم أعلنتم رأيكم أنكم علي رأس هذه الفئات من شعبكم الذين تقفوا وتقولوا لهم قفوا مكانكم الزموا مكانكم

مصر لنا جميعا ومصر ليست حكرا لأبي مخلوق يفرض نفسه عليها ومصر خيرها لنا جميعا ولأبنائنا جميعا ، استحلوا لنفسهم كل شئ بدعوي أنهم هم الأحق بحكم مصر بدأوها يوم أن وقف أحدهم في نقابة المحامين وتليت رسالة في نقابة المحامين أنه حقوق العمال والفلاحين في مصر ده أمر غريب وشاذ وعجيب وانه الكلام ده لا بد أن ينتهي أي أن نعود السواد الأعظم نحن طبقات الشعب نعود كما كنا خدام الفئة هم أسمهم الحكام بدأوا هذا في نقابة المحامين وشوهوا نقابة المحامين وهي أقدم نقابة في مصر

وهي النقابة التي ظلت حصن للدفاع عن الحريات وعن الكرامات ضد المستعمر ، وضد الملك ، وضد الأحزاب الفاسدة أراد حزب أن يستغل هذه النقابة لكي يحولها لدار للتأمر علي ثورة ٢٣ يوليو

ده كان مبعث الخطورة اللي جعلتني أطلب من مجلس الشعب أنه يحقق هذا ويضع كل أنسان في مكانه وبعد أن تغيرت بقوة القانون وبقوة الشعب لأنني طلبت أن تذاع الحقائق كلها علي الشعب بعد أن تغيرت الأحوال وأصبحت النقابة لمصر ولشعب مصر وليس للفئة أو الزمرة التي تريد أن تستغل لجأوا الي استغلال الدين ، الدين كلمه الله لنا سبحانه وتعالى لكي تعمر الأرض ، الدين الذي يدعونا الي المحبة ، الدين الذي يدعونا جميعا الي أن نكون أخوة يحس كل منا بأخيه ، الدين الذي هو جزء من دماؤنا جميعا ، الدين الذي نمارسه في قرانا في نجوعنا تمارسوه أنتم في الأرض والبحر والنهر

ويمارسه معكم شعبكم باسم الله القوي الرحمن الرحيم أرادوا أن يستغلوا الدين في الحقد ، وقف أو دفعوا بعض من يسميهم بالدعاة وهم دعاة الفتنة وليسوا شيوفا أبدا يقف شيخ منهم هنا في الاسكندرية لكي يستخدم أبدا العبارات ولكي يستخدم أخط لغة ويكذب لكي يهاجم شعب ، يهاجم النظام في مصر ، بلا حياء وبلا خجل يقف أحدهم هنا دعاة الفتنة ويقول أنه جريدة مايو أنصرف عليها خمسة مليون جنيه من شعب مصر ، داعي الفتنة هذا مدفوع مدفوع من رجال أحزاب قائمة وتعمل في السياسة .. النهارده نائب

رئيس حزب العمل كان يبجي هذا الداعي من دعاة الفتنة وقف يقول أنه
الحزب الوطني أخذ ٥ مليون جنيه لجريدته الكذاب بالكذب من علي منبر
الجامع وبعدين دا مصر دولة ودولة من ٧ آلاف سنة وحكومة وميزانية
وكل مليم يصرف بيعلن رسمي أمام مجلس الشعب ولو انه عاد الي الوقائع
المصرية اللي ما بيقرأهاش الشعب هو أراد أنه يضلل الشعب لان قليلين
اللي بيقرأوا الوقائع المصرية فيها فعلا أن شركة قامت علشان تصدر جريدة
مايو واشترك المؤسسين فلان وفلان في رأس المال ودفعوا فلان كذا وفلان
كذا وفلان كذا كل شركة بتقوم في مصر وكل عمل بيتم بيطلع في الوقائع
المصرية وفيه كل شئ علشان يبقى كل انسان علي بينه شركة مايو الـ
خمسة مليون جنيه اللي دفعوهم المساهمين مكتوبين بالاسم في الوقائع
المصرية من يوم ما تمت هذه الشركة شأنها شأن أي شركة أو أعمال أخري
بتتم في مصر

أنما وهم يدعوا أنهم رجال قانون يدفعوا بدعاة الفتنة شيخ من الأزهر ،
والأزهر برئ منه وسأطلب من النيابة في هذه النقطة وغيرها أن تتخذ معاه
الاجراءات الجنائية لأنه ما هوش بس بيضلل الشعب ويعمل فتنة في الشعب
لا ده بيكذب ، بيكذب لأنه كل شئ في هذا البلد مثبت في كل الوقائع
الرسمية بتاعة الدولة ودولة وحكومة إنما هم عايزين يشككوا في كل شئ ما
استباحوش الدين بس أستباحوا أيضاً أنهم بيقولوا أنه ما يسمي بالمعارضة
لهم حق الاثارة والتشكيك أي أنه من حق المعارضة أنها تعمل اثارة ضد

النظام وتشكك في النظام وفي كل الحكومة اللي بتعمل من أجل الانجازات للشعب ، كتبوا هذا في جريدتهم وكتبوا مين كتبه .

رجل كان مفروض أنه يعرف القانون .. وكان مفروض ومغطي نفسه قدامنا كإنسان فاضل لغاية ما بلغ سن ٦٩ سنة بدء يكشف عن نفسه من حق المعارضة التشكيك والاثارة ، يعني كل عمل يطلعوا علي الشعب فيه ويقولوا أبدا ده غلط واللي قايمين بيه غلط وفلان سرق .. وفلان خد رشوة وفلان خد كذا قال ده من حق المعارضة ، هي دي تبقي معارضة ده تخريب .. استغلوا ده لأنه في ديمقراطية في البلد .. وفيه أمن وأمان وأنا قلت لا يمسه انسان في مصر لا في أمنه ولا في آمانه ولا في رزقه أبدا ، وهذا الي الآن ماشي وسيظل باذن الله الي الابد بتوفيق الله وبارادتكم أنتم شعب مصر .. بتوفيق الله وبارادة شعب مصر حتظل مصر لنا جميعا مش للفئة الباغية .. بارادة الله وتوفيقه ، وبارادة شعب مصر وعملنا حيظل أولادنا يتعلموا ويطلعوا دكاترة ، ومهندسين ، ضباط مش أولاد الطبقة اللي أحتكرت ده زمان لنفسها وكان محكوم علينا كلنا ولادنا يطلعوا ما يتعلموش بارادة الله سبحانه وتعالى ، وبارادة شعب مصر وعمله سوف يظل الدين للديان ، .. سوف تظل عقيدتنا .. عقيدتنا اسلامية أو مسيحية في غير عرضة اطلاقا لان يمسه انسان أو أن يستغلها للحقد أو للاثارة أو للتشكيك

كما أرادوا .. سيظل الدين في دمننا لاننا ، بحمد الله ، وبارادته ، وبتوفيقه
أرضنا مهد الأديان علي أرض سيناء وفي الوادي المقدس نزلت أول
رسالات السماء من الله سبحانه وتعالى الي موسى وكلم الله موسى علي
جبل سيناء .. ، جبل سيناء هو قطعة من أرض مصر .. لما أختار ربنا
سبحانه وتعالى لأول وآخر مره أن يتحدث الي انسان أختار أرض مصر
والوادي المقدس في سينا أختاره علشان يكلم الانسان ويوعظ الانسان وينزل
أول رسالة علي الأرض للعمران ، علي أرض مصر ، أرضنا اذن مقدسة ،
وأرضنا هي مهد الأديان والدين جزء من دمننا فلن نسمح أبدا أن يستغل
الدين للحقد ، للاثارة ، للتشكيك

أنا أردت أن أعرض الأمر علي الشعب كله لكي يستمع أولئك الذين في
الخارج والداخل أنه ... شعب مصر لا يعود أبدا باذن الله الي الورااء ...
أبدا ... ، شعب مصر النهاردة ، شعب مصر مصمم علي أن يسير علي
بركة الله الي الأمام وسمعتوني ، يد الله فوق أيدينا .. بحمد الله في سنة
٧٢ سمعتوني كنت بأدور علي مليون دولار قعدت أسبوع أدور علي مليون
واحد أبعته أمريكا لانه كان بيعلن أفلاس مصر أيامها نبعت المليون دولار
علشان يحوشوا إعلان الافلاس ده كان سنة ٧٢ . سنة ٧٣ كلكم سمعتوني
أني لما جمعت مجلس الأمن القومي يوم ٥ رمضان قبل المعركة بخمس أيام
وأعضاءه جميعا أحياء الي اليوم يوم ما جمعتهم قلت لهم يوم ٥ رمضان
اقتصاد مصر تحت الصفر لكن كرامتنا فوق في سابع سما

عملنا المعركة واستعدنا شرفنا وارادتنا وكرامتنا وثقة العالم فينا وأستعدنا للعرب كلهم ثقة العالم فيهم بمعركتنا أحنا بتاعة العبور ومتعاليناش عليهم ما منيناش عليهم فلما جه الوقت اللي أترنقنا فيه بدأوا يحنوا علينا .. منوا علينا العرب اللي الفئة الباغية بتقول أحنا سبنا العرب ورحنا لاسرائيل احنا ماسبناش العرب ، ده هم اللي سابونا ، واسرائيل ، ده أنا قعدت مع اسرائيل علشان قضية مصر بلدي ، وقضية سينا بلدي دي تخصني ، دي عند اسرائيل فاروحت لاسرائيل قلت لهم تعالوا دي أرضي ودي تخصني طب نعمل السلام وربنا سبحانه وتعالى قال لنا " ان جنحوا للسلام فاجنح لها " جنحوا للسلام .. جنحوا للسلام وجنحنا لها وعملنا اتفاقية السلام بعد كامب ديفيد وخذنا ٨٠% من أرض سيناء ، وبعد سبعة أشهر أو ثمانية باذن الله في أبريل المقبل باذن الله بنأخذ الباقي من أرض سيناء .. ومع ذلك حانظل نعمل مع اسرائيل علشان القضية الفلسطينية مش أننا حانتكلم عن الفلسطينيين أو أننا حانتكلم عن بقية العرب وإنما أحنا نريد أنه الاحتلال الاسرائيلي للضفة وغزة ينتهي ويبجوا الفلسطينيين زي أنا ما عملت ويقعدوا مع الاسرائيليين ويقولوا لهم هاتوا أرضنا ويتفقوا زي أحنا ما أتفقنا مع اسرائيل

اذن محاولة استغلال الدين عشان يقولوا ان احنا قال بعدنا عن العرب والمسلمين وروحنا لاسرائيل واليهود .. أهو احنا مابعدناش عن العرب ولا المسلمين ده أنتم اللي قطعتموا العلاقات معنا احنا ما قطعناش علاقتنا الرسمية مع حد .. ده أنتم اللي اجتمعتموا في بغداد وقطعتموا العلاقات .. طب رجال

الدين هنا بقره يقولوا ان احنا سايبين العرب والمسلمين وعلشان نروح
نصادق اليهود احنا رحنا لاسرائيل علشان السلام لما جنحو للسلام جنحنا لها
وعاوز أقول ستستمر علاقاتنا مع اسرائيل علاقات حسن الجوار وعلاقة
أصدقاء طالما ان كل انسان بيحترم ارادة واستقلال وأراضي الثاني ...
ومش مع اسرائيل بس ، لا . مع اسرائيل ومع كل من يحترم ارادة شعب
مصر

الحاجة الثانية اللي بيقلوها برضه . وعاوزين يستغلوا فيها الدين أمريكا
والهجوم علي أمريكا ، بيهجوا قال أن احنا أمريكا بتتدخل في شئوننا ،
سمعتوا امبارح لما أول امبارح لما واحد صحفي أمريكي بيقلولي أنت
أستاذت ريجان وأنت عنده ، قلت له والله لولا الديمقراطية لضربتك
بالرصاص ده يوم ماحسيت أن الروس بيلعبوا بديلهم وبدهم يتدخلوا في
شئوننا قلت لـ ١٧ ألف خبير سوفيتي بره في أسبوع واحد ، وحددت ..
ومع أمريكا .. أمريكا .. ما قعدنا ١٥ سنة وأحنا في خناقة وفي الخمس ..
ست سنين كان قبل ولايتي كانت مقطوعة العلاقات بينا وبين أمريكا لكن لما
جه نيكسون وبعديه جه فورد وبعدين جه كارتر وأحترموا ارادة شعب مصر
... وبيعاملوا مصر معاملة الند للند اللي يعمل معنا كده ، اللي يمشي
ناحيتنا بأخلاق خطوه ، نمشي احنا قدامهم عشرة مادام باخلاق

أمريكا مامشيتش خطوه واحدة ... أمريكا لما جيت أنضف قناة السويس
علشان الملاحة العالمية بعنت لي ونضفت القناة والي يومنا هذا .. لا طلبوا

مني تمن ولا أعرف هم المصاريف اللي صرفوها بالملايين تمت ازاي
لغاية النهاردة لا دفعنا ولا شئ وبدال .. وبدال .. وبدال ماكنت سنة ٧٢
زي ما قلت لكم منش لاقى مليون دولار أبعته أحوش بيه اعلان أفلاس
مصر ... وبدال ما كان اقتصادي تحت الصفر ... سنة ٧٣ قبل المعركة
بعد ما فتحت القناة سنة ٧٥ .. أبتديت تديني ٤٠٠ مليون دولار في السنة ..
لأيه .. للشعب وللبناء اللي أحنا بنبنيه كله ... أبتدينا المشروع بتاع تحسين
القناة بعد ما فتحناها ٧٥ السنة اللي فاتت في ديسمبر أولادي اللي في
بورسعيد .. أحتفلوا كانوا معايا هناك في بورسعيد .. وعلشان بنفتح القناة
اللي قلنا عليه الافتتاح الثالث بعد مشروع أرتفع السنة دي في ديسمبر أي
بعد أربعة أشهر ان شاء الله أو ثلاثة .. يخش لنا من القناة ألف مليون و
٢٠٠ مليون دولار ١٢٠٠ مليون دولار

من هنا أنا بقول يد الله فوق أيدينا ... ده رزقه .. رزقه أنه مليون دولار
مش لاقينهم سنة ٧٢ بيقوا ٤٠٠ في ٧٥ بيقوا مليار و ٢٠٠ مليون في ٨١
، ده مش بس كده .. ده جت مفاجأة أكبر علشان برضه .. ما هو كله منه
.. وبتوفيقه .. وينظر الي القلوب ويعرف ما في الداخل .. ويعلم خائنة
الأعين وما تخفي الصدور خدنا ٨٠% من أرضنا من سيئات وفيها بترول ..
يقوم يشاء الله سبحانه وتعالى متبقاش بس الأرض اللي عندي لا يرزقنا من
البتترول ما لم نعد في حاجة به الي أي انسان أو أي دولة رزق منه .. ليه
.. أصله لما يطرح البركة يبقى كل شئ بغير حساب رزقه لنا لأنه طرح
البركة لأنه يعلم ما في قلوبنا وما في صدورنا ويعلم حقيقة العرق اللي

بنبذله باخلاص علشان نبني البلد قام ادانا هذه النعمة البترول بعد سنتين لما
يخلصوا المواسير دا اتوجد خلاص لكن بعد سنتين لما يخلصوا المواسير
باذن الله ماعدناش نحتاج اطلاقا لأي دولة وعادت ميزانيتنا ابتداء من السنة
دي لأول مرة مافيهاش عجز .. دا ليه ... ربنا سبحانه وتعالى زي ما بقول
لكم حاطط أيده فوق أيدينا وقال لنا البلد الطيب يخرج نباته باذن ربه والذي
خبث لا يخرج الا نكدا طيب أحنا ماشيين بلد طيب ليه الحاقدين والموتورين
عايزين يحولونا الي بلد خبيث نعمة الله سبقت الحمد لله وأصبحنا الشعب
كلنا مسيطرين ٥٠% للعمال والفلاحين . أولادنا قدامهم الفرص متكافئة
علشان يتعلموا ويبقوا مهندسين ودكاترة لا عودة الي الورا، لا عودة الي
أسلوب ما قبل ثورة ٢٣ يوليو لا عودة لمراكز القوي اللي تقول للمراسلين
الأجانب أكتبوا وشوهوا صورة مصر بره ، ويتحالفوا مع اعداء مصر ، لا
عودة للي يدعوا المعارضة وبعدين بيعتوا كلامهم كله للعرب الموتورين من
حولنا علشان يهاجمونا من كتباتنا احنا ومن كلامنا احنا ومن صحافتنا احنا
لا عودة أبدا لهذا أما الديمقراطية فبقولها لكم لا عودة فيها ابدا لن نعود في
الديمقراطية أبدا بل زي ما قال الشيخ علي مزيد من الديمقراطية بس كمان
الدور ده بقي مزيد من الانضباط كل واحد يلّم نفسه ... ان شاء الله يوم
الاثنين أنا مواعد الشعب اني أكلمه وأكلمكم عن المرحلة الجديدة عايزين
نحقق في كل اللي فات علشان ما يتكرر ش تاني واللي حايطلع برئ حانعلنه
برئ لان احنا ما بنخفش ولأنه يوم ما عملت الاجراء اللي عملته نشرت
الأسماء في الصحف كلها ما فيش حاجة بتتعمل من وراء الشعب أبدا
ومعروف

ان شاء الله يوم الاثنين حأتكلم العملية ما هيش بس اللي أستغلوا كلمة الدين أو اللي استغلوا كلمة المعارضة أو اللي استغلوا كلمة الديمقراطية أبدا دا المسألة أكبر من كده المسألة السلوك في البلد التهجم علي الحكومة التهجم وقلة الحيا في مخاطبة الحكام البذاءة التسبب عدم الانضباط في الشارع عدم الانضباط في العمل عدم الانضباط في الانتاج كل هذا وفوق ده وقبل ده كله البنت أو الولد اللي حايخرج عن طوع أهله بالجماعات الاسلامية ده خياخذ أقصى العقاب زي ما سمعتوني زي ما سمعتوني احنا شعب مهد الرسالات السماوية والأرض اللي ربنا سبحانه وتعالى اختارها علشان يكلم الانسان عليها . أرضنا مقدسة عشان كده احنا كمان دي أدياننا مقدسة جوانا ما يستغلش الدين علشان البنت تطلع من عصمة أهلها ولا الولد يطلع عن عصمة أبوه ولا يستغلش الدين في محاولة فرض أساليب واجرام فئات بتترق الشباب ومن هنا يوم الاثنين هقول لولادي الشباب أعبدوا ربكم ياولادي زي ما أنتو عايزين وزي ما تطلبوا لكن ما حدش يبيع أرادته ويقول السمع والطاعة لواحد عاوز يستغله السمع والطاعة لله سبحانه وتعالى .. العمل في الدولة لهجة في مخاطبة بعضنا كلنا كشعب وبين الشعب والحكام وفي المجالس وفي المؤسسات ، نرجع بقة لأحوال وتاريخ العيلة المصرية ، العيلة المصرية اللي تعرف العيب ، العيلة المصرية اللي لها تقاليد المروءة ، النجدة ، الشهامة الأصالة ، مش الحقد ، الحب ، الحب بأوسع مداه بين

أفراد العائلة كلها والعائلة مسلمين وأقباط عيلة واحدة ماهيش علتين عيلة
واحدة ماهيش علتين أبدا وقبل ما أختم كلمتي .. بحق أنا فخور بيكم وفخور
بالاثنين مليون صياد اللي سبقوا مصر كلها وفي مؤتمرهم خدوا القرارات
اللي خدتموها وحسيتوا ببلدكم وباللي تعانيه بلدكم ورميتوا كل المشاكل
وحطيتوا مصر فوق كل شئ ... أنا فخور بيكم وبلغوا كل صياد أنني فخور
بيكم وبلدكم فخورة بيكم وحلقتي بيكم جميعا يوم الاثنين ان شاء الله وفي
العام المقبل اذا مد الله في عمري .. في العام المقبل ان شاء الله اذا أمد الله
في عمري فسأتي اليكم لاحتفل بمرور ١٣ سنة علي ولايتي نقول فيها ايه
اللي تم واياه اللي جري ونقول للعالم ونقول لكل آدي اللي عمله شعبنا وآدي
المستقبل لنا ولأبنائنا وكما قلت لكم أحمد الله أن يده سبحانه وتعالى فوق
أيدينا

" ربنا لا تزغ قلوبنا بعد اذ هديتنا وهب لنا من لدنك رحمة انك انت الوهاب "

والسلام عليكم ورحمة الله